

四庫全書

子部

欽定四庫全書

子部

藝文類聚卷二十九

詳校官中書臣李彤

員外郎臣牛稔文覆勘

總校官知縣臣楊懋珩

校對官中書臣李荃

騰錄監生臣徐紹城

欽定四庫全書

藝文類聚卷二十八

唐 歐陽詢 撰

人部十二

遊覽

遊覽

家語曰孔子北遊登農山子路子貢顏回侍孔子四望喟然歎曰二三子各言爾志

穆天子傳曰天子遂襲崑崙之丘遊軒轅之宮眺望鍾山之嶺玩帝者之寶勒石王母之山紀迹玄圃之上乃

取其嘉木艷草奇鳥怪獸玉石珍瑰之器重膏銀燭之寶又曰天子北昇於春山之上以望四野春山是惟天下之高山也天子五日觀於春山之上

史記曰始皇三十七年上會稽山望於南海立石刻頌秦德還過吳從江乘渡傍海上北至瑯琊又曰太史公登會稽山探禹穴登姑蘇望五湖

莊子曰莊子與惠子遊濠梁之上莊子曰儵魚出遊從容是魚樂也惠子曰子非魚焉知魚之樂也莊子曰子

非我焉知吾不知魚之樂也

楚辭曰覽冀州兮有餘橫四海兮焉窮又曰登崑崙兮
四望心飛揚兮浩蕩日將暮兮悵忘歸遺極浦兮悟懷
韓詩外傳曰齊景公遊於牛山而北望齊曰美哉國乎
鬱鬱蒼蒼

淮南子曰所謂樂者遊雲夢陟高丘耳聽九韶六莖口
味煎熬芬芳馳騁夷道釣射鵬鵠之謂樂乎

戰國策曰昔楚王登彊臺而望崇山左江湖以臨方

湟其樂忘死

說苑曰齊景公遊海上樂之六月不歸又曰楚昭王欲之荆臺遊司馬子綦進諫曰荆臺之遊左洞庭之波右彭蠡之水南望獵山下臨方淮其樂使人遺老而忘死新序曰晉平公遊西河中流而歎曰嗟乎安得賢士與共此樂乎

列女傳曰楚昭王燕遊蔡姬在左越姬參乘王親乘馭以逐登附莊之臺以望雲夢之囿乃顧謂二女曰樂乎

吾願與子生若此

世說曰過江諸人每暇日輒相要出新亭藉卉飲宴周侯中坐而歎曰風景不殊舉目有江河之異

詩古詩曰青青陵上柏磊磊澗中石人生天地間忽如遠行客驅車策駑馬遊戲宛與洛長衢羅夾巷王侯多第宅兩宮遙相望雙闕百餘尺極宴娛心意戚戚何所迫

魏文帝在孟津詩曰良辰啓初節高會構歡娛清歌發

妙曲樂正奏笙竽曜靈忽西邁炎燭繼望舒明日浮黃
河長驅旋鄴都又銅雀臺詩曰朝遊高臺觀夕宴華池
陰大茵奉甘醪獸人獻嘉禽齊倡發東舞秦箏奏西音
飛鳥翻翔舞悲鳴集北林樂極哀情來慘恨摧肝心又
於清河作詩曰方舟戲長水澹澹自浮沉絃歌發中流
悲風漂餘音

魏王粲詩曰悠悠涉荒路靡靡我心愁四望無煙火但
見林與丘城郭生榛棘蹊徑無所由萑蒲竟廣澤葭葦

夾長流遊客多悲傷淚下不可收朝入譙郡界曠然
消人憂詩人美樂土雖客猶願留又詩曰日暮遊西
園冀寫憂思情曲池揚素波列樹敷丹榮上有特栖
鳥懷春向我鳴又詩曰吉日簡清時從君出西園方
軌策良馬並驅厲中原北臨清漳渚西看栢楊山回
翔遊廣囿逍遙波水間又詩曰列車息衆駕相伴綠
水湄幽蘭吐芳烈芙蓉發紅暉百鳥何續翻振翼羣
相追投網引潛鯉强弩下高飛白日已西邁歡樂忽

忘歸

魏陳琳詩曰高會時不娛羈客難為心慙懷從中發悲
感激清音投觴罷歡坐逍遙步長林蕭蕭山谷風黯黯
天路陰惆悵忘旋反歔歔涕霑襟又詩曰節運時氣舒
秋風涼且清閒居心不娛駕言從友生翔翔戲長流逍
遙登高城東望看疇野迴顧覽園庭嘉木凋綠葉芳草
纖紅榮騁哉日月逝年命將西傾建功不及時鍾鼎何
所銘收念還房寢慷慨詠墳經庶幾及君在立德垂功

名

晉陸機遨遊出西城詩曰遨遊出西城按轡循都邑逝
物隨節改時風肅且熠遷化有常然盛衰自相襲靡靡
年時改冉冉老已及行矣勉良圖使爾修名立

晉棗據詩曰矯足登雲閣相伴步九華徙倚憑高山仰
攀桂樹柯延首觀神州迴睛眄曲阿芳林挺脩幹一歲
再三花何以濟不朽噓吸漱朝霞重巖吐神瀟傾觴挹
涌波恢恢大道聞人事足為多

晉張載登成都白菟樓詩曰重城結曲阿飛宇起層區
累棟出雲表峽嶽臨太虛高軒啓朱扉迴望暢八隅西
瞻岷山嶺差峩似荆巫蹲鴟蔽地生原隰殖嘉蔬雖遇
堯湯世民食恒有餘鬱鬱小城岵岵百族居街術紛
綺錯高甍夾長衢借問楊子舍想是長卿廬

晉陸冲詩曰命駕遵長塗綿邈塗難尋我行一何艱山
川阻且深洿澤無夷軌重巒有曾陰零雨淹中路玄雲
蔽高岑俯悼孤行獸仰歎偏翔禽空谷回悲響流風漂

辰音又詩曰肆觀野原外放心希太和景嶽造天漢豐
杯冒重阿清芬乘風散艷藻映淥波

木江夏王義恭登景陽樓詩曰丹墀設金屏瑤榭陳玉
牀溫宮冬開燠清殿夏含霜弱藥布遐馥輕葉振遠芳
彌望少無際肆睇周華疆象闕對馳道飛廉矚方塘郎
寺送暉曜槐柳自成行通川溢輕艫長街盈方箱顧此
燭火微胡顏廁天光又彭城戲馬臺集詩曰騁驚辭南
京弭節憇東楚懿蕃重遐望興言藥僚侶于役未云淹

時遷變溽暑眷戀江水流迴首獨延佇

不袁淑登宣城郡詩曰悵焉訊舊老茲前乃楚居十代
陶州記百祀絕方書

不顏延之罷郡還與張湘川登巴陵城樓詩曰江漢分
楚望衡巫奠南服三湘淪洞庭七澤藹荆牧悽矣自遠
風傷哉千里目萬古陳往還百代勞起伏又登景陽樓
詩曰風觀要春景月樹迎秋光汧波被華若隨山茂貞
方

宋鮑照行樂至城東橋詩曰迅風首旦發平路寒飛塵
擾擾遊宦子營營市井民懷金近從利撫劍遠辭親爭
知萬里途各事百年身

宋謝瞻遊西池詩曰逍遙越郊肆願言屢經過迴阡被
陵闕高臺眺飛霞惠風蕩繁圃白雲屯曾阿褰裳順蘭
沚徙倚引芳柯美人愆歲月遲暮獨如何

宋謝靈運晚出西射堂詩曰步出西掖門遙望城西岑
連障疊巘嶠青翠杳深沉曉霜楓葉丹夕曛嵐氣陰節

往感不淺感來恨已深羈雌戀舊侶迷鳥懷故林含情
尚勞愛如何離賞心撫鏡華緇鬢攪帶緩促衿安排徒
空言幽獨賴鳴琴又登池上樓詩曰殉祿反窮海卧病
對空林傾耳聆波瀾舉目眺嶇嶇初景革緒風新陽改
故陰池塘生春草園柳變鳴禽索居易永久離羣難處
心持操豈獨古無悶徵於今又登江中孤嶼詩曰江南
倦歷覽江北曠周旋懷新道轉迴尋異景不延亂流趨
正絕孤嶼媚中川雲日相暉映空水共澄鮮表靈物莫

賞蘊真誰為傳又東山望海詩曰開春獻初歲白日出
悠悠蕩志將愉樂瞰海庶忘憂策馬步蘭皋縹控息椒
丘採蕙遵大薄蹇若履長洲白華縞陽林紫葩曄春流
非徒不弭忘覽物情彌道萱蘇始無慰寂寞終可求又
初往新安至桐廬口詩曰締綌雖淒其授衣尚未至感
節良已深懷古徒役思不有千里棹孰申百代意遠協
尚子心遙得許生計既及冷風善又即秋水駛江山共
閒曠雲日相照媚景夕羣物清對玩咸可喜

宋謝莊遊豫章西山觀洪崖井詩曰幽願平生積野好
歲月彌捨簪神區外整褐靈鄉垂林遠炎天隅山深白
日虧遊陰騰鵠嶺飛清起鳳池隱暖松霞被容與澗煙
移將遂丘中性結駕終在斯

齊謝朓和徐勉出新林渚詩曰宛洛佳遨遊春色滿皇
州結軫青郊路迴瞰滄江流日華川上動風光草際浮
桃李成蹊徑桑榆蔭道周又遊東田詩曰戚戚苦無悰
攜手共行樂尋雲陟累榭隨山望茵閣遠樹暖芊芊山

烟紛漠漠魚戲新荷動鳥散餘花落不對芳春酒還望
青山郭

梁簡文帝仰和衛尉新渝侯巡城口號詩曰帝景風雨
中層闕烟霞浮玉署清餘熱金城含暮秋水光凌却敵
槐影帶重樓又薄晚逐涼北樓迴望詩曰平衢望如掌
曾雉暖相連斷雲留去日長山減半天戲鳬乘狀下漁
舟冒浪前又大同八年秋九月詩曰大君重九節下輦
上林中酒闌嘉宴罷車騎各西東時余守西掖脂車歸

北宮車分獨坐道扇拂冶城風落照壘中滿浮烟槐外
通長樂含初紫安榴拆晚紅又大同九年秋七月詩曰
高樓闢左扇迴望依蘭橈晚風颺颺來落照參差好又
登錦堂詩曰孫生酸棗寺王子枝江樓何如登石鏡因
閒猶豫遊又應令詩曰蠡浦急兮川路長白雲重兮出
帝鄉平原忽兮遠極目江甸阻兮羈心傷樹廬岳兮高
且峻膽派水兮去泱泱遠烟生兮含山勢風散花兮傳
馨香臨清波兮望石鏡瞻鶴嶺兮睇仙裝望邦畿兮千

里曠悲遙夜兮九迴腸顧龍樓兮不可見徒送目兮淚
霑裳

梁元帝出江陵縣還詩曰遊魚迎浪上雒雉向林飛遠
村雲裏出遙船天際歸又詩曰朝出屠羊縣夕反仲宣
樓水滿還侵岸沙盡稍開流又登江州百花亭懷荆楚
詩曰目極纔千里何由望楚津落花灑行路垂楊拂砌
塵柳絮飄春雪荷珠漾水銀試酌新春酒遙勸陽臺人
梁昭明太子示雲麾弟詩曰白雲飛兮江上阻北流兮

兮山風舉山萬仞兮多高峯流九派兮饒江渚上岵崑
兮乃逼天雲微濛兮後興雨實覽歷兮此名地故遨遊
兮茲勝所爾登涉兮一長望理化顧兮忽憶予想玉顏
兮在目中途踟躕兮增延佇

梁沈約登高望春詩曰登高眺京洛街巷何紛紛迴首
望長安城闕鬱盤桓齊童躡珠履趙女揚翠翰春風搖
雜樹葳蕤綠且丹寶瑟玫瑰柱金羈玳瑁鞍淹留宿下
蔡置酒過上闌日出照鈿黛風過動羅紈又秋晨羈怨

望海思歸詩曰分空臨澥霧披遠望滄流八桂暖如畫
三桑眇若浮烟極希丹水月表望青丘

梁劉孝威登覆舟山望湖北詩曰紫川通太液丹岑聯
少華堂皇更隱映松灌雜交加荇浦浮新葉漁舟繞落
花浴童爭淺岸漂女擇平沙極望傷春日迴車空狹斜
又出新林詩曰芒山眊洛邑函谷望秦京遙分承露掌
遠見長安城故鄉已可識遊子必勞情霧罷前村見風
息涌川平坐觀暮潮落漸見夕烟生無由一羽化徒想

風御輕

梁劉孝標江州還入石頭詩曰鼓枻浮大川延睇洛城
觀洛城何鬱鬱杳與雲霄半前望蒼龍門斜瞻白鶴館
槐垂御溝道柳綴金隄岸迅馬晨風趨輕輿流水散高
歌梁塵下絙瑟荆禽亂我思江海遊曾無朝市玩忽寄
靈臺宿空軫及關歎仲子入南楚伯鸞出東漢何能栖
樹枝取斃王孫彈

梁蕭子範東亭極望詩曰晚流稍東急暝景促西暉水

馬銜魚望蓮舟拂芰歸郊原共起遠林野雜依菲從君
採蘿葛寧復想輕肥

梁蕭子暉應教使客春遊詩曰上林看草色河橋望日
暉洛陽城閉晚金鞍橫路歸

梁蕭子雲落日郡西齋望海山詩曰漁舟暮出浦漢女
採蓮歸夕雲向山合水鳥望田飛蟬鳴早秋至蕙草無
方菲故隱天山北夢想日依依

梁吳筠登鍾山讌集望西靜壇詩曰客思何以緩春郊

瀚初律登車陸離至駿騎差池出寶椀汎蓮花珍杯食
竹實才勝商山四文高竹林七復望子喬壇金繩蘊綠
映風雲生屋宇芝英被仙室方隨鳳皇去悠然駕白日
又迎柳吳興道中詩曰團團日西靡客念已蹉跎長風
倒危葉輕練網寒波白雲光彩麗青松意氣多所言飽
恩德忘我北山蘿

梁庾肩吾登城北望詩曰誓師屠六郡登城望九嶷山
沉黃霧裏地盡黑雲中霜戈曜壠日哀笳斷塞風又和

衛尉新渝侯巡城口號詩曰維城寄右戚巡警屬勤王
南瞻通灞岍北眺指橫芒入漢飛延閣臨雲出建章步
逐天津遠城隨秋夜長露槐落金氣風窸上新涼又暮
遊山水賦韻得磧字應令詩曰餘春屬清夜西園恣遊歷入
徑轉金輿開橋通畫鷁細藤初上援新流漸涵磧雲峯
沒城柳電影開巖壁又和晉安主簿晚逐涼北樓廻望
詩曰向夕紛喧屏追涼飛觀中樹影臨城日牕舍度水
風遙天如接岍遠帆似凌空陪文懃宋玉徒等侍蘭宮

梁王僧孺落日登高詩曰憑高且一望目極不能捨東
北指青門西南見白社軫軫河梁上紛紛渭橋下爭利
亦爭名驅車復驅馬寧訪蓬蒿人誰憐寂寞者又至牛
渚憶魏少英詩曰楓林暖似畫沙岼靜如掃空籠望玄
石迴斜見危島綠草間遊蜂青葢集輕鷁徘徊洞初月
侵淫潰春滂非願歲物華徒用風光好

梁王筠和衛新渝侯巡城詩曰閭闔暖已昏鈎陳杳將
暮樓烏城上反晚崔林中度閣道趨文昌禁兵連武庫

銅鳥迎早風金掌承朝露
累愚分曉色睥睨生秋霧
梁劉綏和晚日登樓詩曰
所以登臺榭正重接烟霞
長虹觸欄斷歸鳥避空斜
俯巢窺暝宿臨樹摘高花
百雉時方晚九層光尚賒

北周宗懌和歲首寒望詩曰
旅騎出平原鉦鼓遍野喧
接里開都邑連車駐小門
稻車迴故塢獵馬轉新村
古碑空戴石山龕未上旂
所言春不至未有桃花源

北齊劉逖秋朝野望詩曰
駐車憑險岨飛蓋歷平湖
菊

寒花稍發蓮秋葉漸枯向浦低行鴈排空轉噪鳥若將
君共賞何處減城隅

陳陰鏗和登百花亭懷荆楚詩曰江陵一柱觀潯陽千
里潮風煙望似接川路恨成遙落花輕未下飛絲斷易
飄藤長還依格荷生不避橋陽臺可憶處惟有暮將朝
又登武昌岬望詩曰遊人試歷覽舊跡但邛壚巴水縈
非字楚山斷類書荒城高仞落古柳細條疎煙蕪遂若
此當不為能居又和侯司空登樓望鄉詩曰懷土臨霞

觀思歸想石門瞻雲望鳥道對柳憶家園寒田穫裏靜
野日燒中昏信美今何益傷心自有源

陳張正見遊龍首城詩曰關外山川閤城隅塵霞浮白
雲凝絕嶺滄波間斷洲四面觀長薄千里眺平邛河津
無桂樹樽酒自淹留

陳江總秋日登廣州城南樓詩曰秋城韻晚笛危榭引
清風遠氣疑埋劍驚禽似避弓海樹一邊出山雲四面
通野火初烟細新月半輪空塞外離羣鳥顏鬢早如蓬

徒懷建業水復想洛陽宮不及孤飛鴈獨在上林中

賦後漢班彪遊居賦曰夫何事於冀州聊託公以遊居
歷九土而觀風亦慙人之所虞遂發軔於京洛臨孟津
而北屬想尚甫之威虞號蒼兕而明誓既中流而歎息
美周武之知性謀人神以動作享烏魚之瑞命瞻淇澳
之園林善綠竹之猗猗望常山之峩峩登北岳而高遊
嘉孝武之乾乾親飭躬於伯姬建封禪於岱宗瘞玄玉
於此丘徧五岳與四瀆觀滄海以周流鄙臣恨不及事

陪後乘之下僚今匹馬之獨征豈斯樂之足娛且休精
於敝邑聊卒歲以須臾

魏陳思王曹植節遊賦曰覽宮宇之顯麗實大人之攸
居建三臺於前處飄飛陛以凌虛連雲閣以遠徑營觀
榭於城隅亢高軒以迫眺緣雲霓而結䟽仰西岳之崧
岑臨漳滏之清渠觀靡靡而無終何眇眇而難殊亮靈
后之所處非吾人之所廬於是仲春之月百卉叢生萋
萋藹藹翠葉朱莖竹林青葱珍果含榮凱風發而時鳥

謹微波動而水蟲鳴感氣運之和潤樂時澤之有成遂
乃浮素葢御驂騶命友生攜同儔誦風人之所歎遂駕
言而出遊步北園而馳騫庶翱翔以解憂望洪池之滉
漾遂降集乎輕舟沉浮蟻於金壘行觴爵於好仇絲竹
發而響厲悲風激於中流且容與以盡觀聊永日而忘
愁嗟羲和之奮策怨曜靈之無光念人生之不永若春
日之微霜諒遺名之可紀信天命之無常愈志蕩以淫
遊非經國之大綱罷曲宴而旋服遂言歸乎舊房又感

節賦曰攜友生而遊觀盡賓主之所求登高墉以永望
冀銷日以忘憂欣陽春之潛潤樂時澤之惠休望候鴈
之翔集想玄鳥之來遊嗟征夫之長勤雖處逸而懷愁
懼天河之一迴沒我身乎長流豈吾鄉之足顧戀祖宗
之靈丘惟人生之忽過若鑿石之未耀慕牛山之哀泣
懼平仲之我笑折若華之翳日庶朱光之長炤願寄軀
於飛蓬乘陽風而遠飄亮吾志之不從乃拊心以歎息
青雲鬱其西翔飛鳥翩而上匿欲縱體而從之哀予身

之無翼大風隱其四起揚黃塵之冥冥野獸驚以求羣
草木紛其揚英見遊魚之泮潏感流波之悲聲內紆曲
而潛結心怛惕以中驚匪榮德之累身恐年命之早零
慕歸全之明義庶不忝乎所生

魏楊修節遊賦曰爾乃息偃暇豫攜手同征遊乎北園
以娛以逞欽太皞之統氣樂乾坤之布靈誕烟煨之純
和百卉挺而滋生谷風習以順時橈百物而有成行中
林以彷徨玩奇樹之抽英或素華而雪朗或紅彩而發

頽綠葉白蒂紫柯朱莖楊柳依依鍾龍蔚青紛紛以
舒葩芳馥馥以播馨嗟珍果之叢生每異類而絕形稟
冲和以固植信能實而先榮於是迴旋詳觀目周意倦
御于方舟載笑載言仰沂涼風俯濯纖腕極歡欣以從
容乃升車而來反

歎晉石崇思歸歎曰登城隅兮臨長江極望無涯兮思
填胷魚鱗潏兮鳥繽翻澤雉遊裊兮戲中園秋風厲兮
鴻鴈征蟋蟀嘈嘈兮晨夜鳴落葉飄兮枯枝竦百草零

兮覆畦壠時光逝今年易盡感彼歲暮兮悵自慙廓羈
旅兮滯野都願御光風兮忽歸徂惟金石兮幽且清林
鬱茂兮芳草盈玄泉流兮縈邛阜閣館蕭寥兮蔭叢柳
吹長笛兮彈五絃高歌凌雲兮樂餘年舒篇卷兮與聖
談釋冕投紱兮希彭聃超逍遙兮絕塵埃福亦不至兮
禍不來

書魏應璩與滿公琰書曰徒恨宴樂始酣白日傾夕驪
駒就駕意不宣展追惟耿介迄于明發適欲遣書會承

來命知諸君子復有漳渠之會西有伯陽之館北有曠
野之望高榭翳朝雲文禽蔽綠水沙場夷敞清風肅穆
是京臺之樂也得無流而不反乎適有事務須自經營
不獲侍坐良增悵悵又與從弟君胄書曰間者北遊喜
歡無量登芒濟河曠若發蒙風伯掃涂雨師洒道按轡
清路周望山野亦既至止酌彼春酒接武茅茨涼過大
厦膚寸肴修味踰方丈逍遙陂塘之上吟詠菀柳之下
結春芳以崇珮折若華以翳日弋下高雲之鳥餌出深

淵之魚蒲且讚善便嫗稱妙何其樂哉雖仲尼忘味於
虞韶楚人流遜於京臺無以過也班嗣之書信不虛矣
來還京都塊然獨處營宅濱洛困於囂塵思樂汶上發
於寤寐昔伊尹輟耕郢惲投竿思致君於有虞濟蒸民
於塗炭而吾方欲執耒於山陽沉緡於丹水知其不如
古人遠矣然山甫不貪天地之樂曾參不慕晉楚之富
亦其志也

藝文類聚卷二十八

欽定四庫全書

藝文類聚卷二十九

唐 歐陽詢 撰

人部十三

別上

別上

毛詩曰出宿于涕飲餞于禰又曰顯父餞之清酒百壺
又曰燕燕于飛差池其羽之子于歸遠送于野又曰有
女仳離慨其歎矣

禮記曰嫁女之家三夜不息燭思相離也

家語曰孔子去周而老子送之曰吾聞富貴者送之以財仁者送之以言吾雖不能富貴而竊仁者之號請送子以言乎凡當世之聰明深察而近於死者好議人者也博辯閎大而危其身者好發人之惡者也孔子曰敬受教

楚辭曰離別也騷愁也言已放逐離別中心愁思又曰悲莫悲兮生別離樂莫樂兮新相知又曰僚慄兮若在遠行登山臨水送將歸又曰超北梁兮永辭送美人兮

南浦

呂氏春秋曰吳起魏武侯送之曰何以治西河對曰以忠信

吳越春秋曰句踐伐吳乃命國中與之訣而國人悲哀皆作離別之聲又曰羣臣送句踐至於江上臨水祖道大夫種為祝句踐舉杯垂涕

孔叢子曰子高遊趙平原君客有鄒文李節者與相友善及將還魯諸故人訣既畢文節送行三宿臨別文節

流涕交頤子高徒抗手而已分背就路其徒問曰先生與彼二子善彼有戀戀之心未知後會何期悽愴流涕而先生厲聲高揖無乃非親親之謂乎子高曰始吾謂二子丈夫爾乃今知其婦人也人豈鹿豕也哉而常羣聚乎

漢書曰武帝平陽公主家衛子夫得幸主因奏子夫送入宮子夫上車主拊其背曰去矣即貴願無相忘又曰疏廣與兄子受並為皇太子師傅廣謂受曰吾聞知足

不辱知止不殆功遂身退天之道也遂上䟽乞骸骨上
許之公卿大夫故人邑子遂為設祖道共帳東都門外
送者車數百輛辭訣去及道路觀者皆曰賢哉二大夫
或歎息為之下泣又曰李廣利將兵擊匈奴丞相為祖
道至渭橋又曰竇皇后弟廣國曰姊去我西時與我訣
於傳舍中沐我又曰成帝遣定陶王之國王辭去上與
相對泣而訣

東觀漢記曰陳遵使匈奴過辭於王丹丹謂遵曰俱

遭世反覆唯我二人為天地所遺今子當之絕域無以相贈贈子以不拜遂揖而別遵甚喜又曰東平王蒼與諸王朝京師月餘還帝臨送歸宮悽然懷思乃遣使手詔諸國曰辭別之後獨坐不樂因就車歸伏軾而吟瞻望永懷實勞我心誦及採菽以增歎息又曰肅宗遣諸王歸國帝特留東平王蒼賜以秘書列圖道術秘方至八月飲酎畢有司復奏遣蒼乃許之手詔賜蒼曰骨肉與天性誠不以遠近親疎然數見

顏色情重昔時中心戀戀惻然不能言於是車駕祖
送流涕而訣復賜乘輿服御珍寶鞍馬錢布以億萬
計又曰光武遣馮異討赤眉車駕送至河南賜以乘
輿七尺具劔勅異曰念自修整無為郡縣所笑異頓
首受命

謝承後漢書曰范丹與王奐親善奐後為漢陽太守丹
於道候別之奐曰行路倉卒非陳閭之所可共到前亭
宿息以叙分隔丹曰今子遠適千里會面無期如其相

追將有慕貴之譏矣便起告違拂衣而去與瞻望弗及
丹長逝不顧

吳志曰魯肅代周瑜過呂蒙酒酣蒙問肅曰君受重任
與關羽為鄰將何計略以備不虞肅應曰臨時施宜蒙
因為畫五策肅於是越席就之拊其背曰呂子明吾不
知卿才略所及至於此也遂拜蒙母結友而別又曰劉
繇亡於豫章孫策命太史慈往安撫之左右皆曰慈必
北去不還策曰子義捨我當復與誰餞送昌門把腕別

曰何時能還答曰不過六十日果如期而反

吳錄曰孫權祖朱桓桓奉觴曰臣當遠去願一捋陛下鬚無所恨權憑几前席桓進捋鬚

魏志曰曹休為鎮南將軍假節都督軍事車馬臨送下輿執手而別

蜀志曰宗豫聘吳孫權捉豫手涕泣而別曰君每銜命結二國之好今君年長孤亦老矣恐不復相見

管輅別傳曰諸葛樂與輅別戒以二言卿性樂酒雖溫

克然不可保寧當節之卿有水鏡之才所見者妙禍如膏火不可不慎

許邁別傳曰邁好養生遣妻歸家東遊采藥於桐廬山欲斷穀以山近人不得專一移入臨安自以無復反乃改名遠遊書與婦別

語林曰有人詣謝公別謝公流涕此人了不悲既去左右曰向客殊自密雲謝公曰非徒密雲乃自旱雷爾世說曰張敷從彭城還傳亮下船與別張不起授手着

舫戶外傳遂不執手熟視張面云查故是梨中不減者
便去

世說曰阮籍嫂嘗歸家籍相見與別人或譏之籍曰禮
豈為我輩設耶

廣州記曰尉他築臺以朝朔望構起華館以送陸賈

沈約宋書曰張敷音儀詳緩與人別執手曰念相聞餘
響久之不絕又曰殷仲文還姑熟祖送傾朝桓謙要參
軍王弘同行荅曰餞離送別必在有情下官與殷風馬

不接無緣扈從謙貴其言

詩古詩曰行行重行行與君生別離相去萬餘里各在天一涯道路阻且長會面安可知胡馬依北風越鳥巢南枝相去日已遠衣帶日已緩浮雲蔽白日遊子不顧反思君令人老歲月忽已晚棄捐勿復道努力加餐飯又曰明月何皎皎照我羅牀幃憂愁不能寐攬衣起徘徊客行雖云樂不如早旋歸又曰涉江採芙蓉蘭澤多芳草採之欲遺誰所思在遠道還顧望舊鄉長路漫浩浩

浩同心而離居憂傷以終老又曰庭中有奇樹綠葉發
華滋攀條折其榮將以遺所思馨香盈懷袖路遠莫致
之此物何足貴但感別經時

漢李陵贈蘇武別詩曰晨風鳴北林熠燿東南飛願言
所相思日暮不垂幃明月照高樓想見餘光輝玄鳥夜
過庭髣髴能復飛褰裳路踟躕彷徨不能歸浮雲日千
里安知我心悲思得瓊樹枝以解長渴饑又贈蘇武別
詩曰良時不再至離別在須臾屏營衢路側執手野踟

踟仰視浮雲馳奄忽交相踰風波一失路各在天一隅
長當從此別且復立斯須欲因晨風發送子以賤軀

漢蘇武別李陵詩曰骨肉緣枝葉結交亦相因四海皆
兄弟誰為行路人況我連枝樹與子同一身昔為鴛與
鴦今為參與辰昔在常相近邈若胡與秦惟念當離別
思情日已新鹿鳴思野草可以喻嘉賓我有一樽酒欲
以贈遠人願子留斟酌慰我平生親

又贈蘇武別詩曰嘉會難再遇三載為千秋臨河濯長

纓念別悵悠悠遠望悲風至對酒不能酬行人懷往路
何以慰我愁獨有盈觴酒與子結綢繆

又蘇武詩曰黃鵠一遠別千里顧徘徊胡馬失其羣思
心常依依何況雙飛龍羽翼臨當乖幸有弦歌曲可以
喻中懷請為遊子吟泠泠一何悲絲竹厲清聲慷慨有
餘哀長歌正激烈中心愴以摧欲展清商曲念子不能
歸俛仰內傷心淚下不可揮願為雙黃鵠送子俱遠飛
又贈蘇武詩曰攜手上河梁遊子暮何之徘徊岐路側

恨恨不能辭行人難久留各言長相思安知非日月弦
望自有時努力崇明德皓首以為期又贈蘇武別詩曰
陟彼南山隅送子淇水陽爾行西南遊我獨東北翔轅
馬顧悲鳴五步一彷徨雙鳬相背飛相違日已長遠望
雲中路想見來珪璋萬里遙相思何益心獨傷隨時愛
景曜願言莫相忘又贈蘓武詩曰爍爍三星列拳拳月
初生寒涼應節至蟋蟀夜悲鳴晨風動喬木枝葉日夜
零遊子暮歸思塞耳不能聽遠望正蕭條百里無人聲

遠處天一隅苦困獨零丁親人隨風散瀝滴如流星願
得萱草枝以解飢渴情又贈蘇武別詩曰鍾子歌南音
仲尼歎歸歟戎馬悲邊鳴遊子戀故廬陽鳥歸飛雲蛟
龍樂潛居人生一世間貴與願同俱身無四凶罪何為
天一隅與其苦筋力必欲榮薄軀不如及清時策名於
天衢

漢蘇武別李陵詩曰雙鳬俱北飛一鳬獨南翔子當留
斯館我當歸故鄉一別如秦胡會見何詎央愴恨切中

懷不覺淚霑裳願子長努力言笑莫相忘又別李陵詩
曰征夫懷往路起視夜何其參辰皆已沒去去從此辭
行役在戰場相見未有期握手一長歎淚為生別滋努
力愛春華莫忘歡樂時生當復來歸死當長相思

魏文帝代劉勲出妻王氏詩翩翩牀前帳可以蔽光輝
昔將爾同去今將爾共歸緘藏篋笥裏當復何時披
魏陳王曹植詩曰門有萬里客問君何鄉人褰裳起從
之果得心所親挽裳對我泣太息前自陳本是朔方士

今為吳越民行行將復行去去適西秦又詩曰微陰翳
陽景清風飄我衣遊魚潛淥水翔鳥薄天飛眇眇客行
士徭役不得歸始出嚴霜結今來白露晞遊子歎黍離
處者歌式微慷慨對嘉賓悽愴內傷悲又送應氏詩曰
願得展嬋婉我友之朔方親昵並集送置酒此河陽山
川迴且遠別促會日長又離友詩曰涼風肅兮白露滋
木感氣兮條葉辭臨淥水兮登重基折秋華兮采靈芝
尋永歸兮贈所思感離隔兮會無期伊鬱悵兮情不怡

魏應瑒別詩曰朝雲浮四海日暮歸故山行役懷舊土
悲思不能言悠悠涉千里未知何時旋又別詩曰浩浩
長河水九折東北流晨夜赴滄海海流亦何抽遠適萬
里道歸來未有由臨河累太息五內懷傷憂

魏徐幹為挽船士與新娶妻別詩曰與君結新婚宿昔
當別離涼風動秋草蟋蟀鳴相隨冽冽寒蟬吟蟬吟抱
枯枝枯枝時飛揚身體忽遷移不悲身體移當惜歲月
馳月馳無窮極會合安可知願為雙黃鵠比翼戲清池

晉孫楚答弘農故吏民詩曰昔我先侯邁德垂化康哉
之詠實由是佐惟余忝辱弗克負荷每歷責邦仰瞻泰
華追慕先軌感想哀嗟詵詵臣故爰及羣士皓首老成
率彼邑里闡崇高義長幼以齒又征西官屬送別詩曰
晨風飄岐路零雨被芳草傾城遠相送餞我千里道乖
離卽長衢惆悵盈懷抱

晉潘岳北芒送別王世胃詩曰朱鑣既揚四轡既整駕
言餞行告離芒嶺情有遷延日無餘影迴轅南翔心焉

北騁又金谷集詩曰王生和鼎實石子鎮海沂親友各
言邁中心悵有違何以叙離思攜手遊郊畿朝發晉京
陽夕次金谷湄回谿縈曲阻峻坂路威夷淥池泛淡淡
青柳何依依玄醴染朱顏但訢杯行遲投分寄石友白
首同所歸

晉潘尼送盧弋陽景宣詩曰楊朱馬所哭岐路重別離
屈原何傷悲生離情獨哀知命雖無憂倉卒意低迴歎
氣從中發灑淚隨襟頽九重不常鍵閭闔有時開愧無

紵衣獻貽言取諸懷又皇太子集應令詩曰聖朝命方
岳爪牙思比鄰皇儲延篤愛設餞送遠賓誰應今日宴
具惟廊廟臣置酒宴猷庭擊鼓靈沼濱羽觴飛醴醪芳
饌備奇珍巴渝二八奏妙舞鼓鐸振長袂生迴飄曲裾
揚輕塵

晉王浚從幸洛水餞王公歸國詩曰聖主應期運至德
敷彞倫神道垂大教玄化被無垠欽若崇古制建侯屏
四鄰皇輿迴羽蓋高會洛水濱臨川講妙藝縱酒釣潛

鱗八音以迭奏蘭羞備時珍古人亦有言為國不思貧
與蒙廟庭施幸得廁大鈞羣僚荷恩澤朱顏感獻春賦
詩盡下情至感暢人神長流無舍逝白日入西津奉辭
慕華輦侍衛路無因馳情繫帷幄乃心戀軌塵

晉陸機祖道畢雍孫劉邊仲潘正叔詩曰皇儲延髦俊
多士出幽遐適遂時來運與子遊承華執笏崇賢內振
纓曾城阿畢劉贊文武潘生莅邦家感別懷遠人願言
歎以嗟又於承明作與弟士龍詩曰牽世纓時網駕言

遠徂征飲餞豈異族親戚弟與兄分塗長林側揮袂萬
始亭南歸憇永安北邁頓承明又送顧公直詩曰伐鼓
五嶺表揚聲萬里外高山何足陵巨海猶縈帶又擬庭
中有奇樹詩曰芳草忽已茂佳人竟不歸感物戀所歡
採此當遺誰

晉王濬祖道應令詩曰侯誰在矣東宮說說曰保曰傳
弘道惟新前疑協衡顧問翼輪豈伊張仲專美前津渙
乎唐德欽在四鄰齊軌上葉永垂清塵

晉左思贈妹九殯悼離詩曰鬱鬱岱青海濱所經陰精
以靈為祥為禎我我令妹應期誕生如蘭之秀如芝之
榮總角岐嶷齒齔成比德古烈異世同聲惟我惟妹
寔惟同生早喪先妣恩百常情女子有行實遠父兄骨
肉之恩固有歸寧何悟離拆隔以天庭自我不見于今
二齡穆穆令妹有德有言才麗漢班明朗楚樊默識若
記下筆成篇行顯中閨名播外藩何以為贈勉以列圖何
以為言申以詩書相去在近上下款款含辭滿胃鬱煩

不舒

晉張華祖道征西應詔詩曰赫赫大晉奄有萬方陶以
仁化曜以天光二跡陝西實在我王內飪玉鉉外惟庶
揚四牡揚鑣玄輅振綏庶寮羣后餞飲洛湄感離歎悽
慕德遲遲又祖道趙王應詔詩曰崇選穆穆利建明德
於顯穆親時惟我王稟姿自然金質玉相光宅舊趙作
鎮冀方休寵曲錫備物煥彰發軔上京出自天邑百寮
餞行縉紳具集軒冕峩峩冠蓋習習戀德惟懷永歎弗

及

晉陸雲餞太尉王公還京邑詩曰聖澤既渥嘉會惜惜
庭旅鐘鼓堂有瑟琴飛轡清暉扶桑移陰視景祗慕揮
袂霑襟戀彼同棲悲爾異林我有旨酒以歌以吟又贈
兄詩曰行矣怨路長愁馬傷別促指途悲有餘臨觴勸
不足我若西流水子如東峙岳慷慨逝言感徘徊居情
育安得攜手俱契闊成駢服悠遠塗可極別促怨會長
銜恩戀行邁興言在臨觴南津有絕濟北渚河無梁神

徃同逝感形留悲參商

曾左九嬪感離詩曰自我去膝下倏忽踰再暮邈邈浸
彌遠拜奉將何時披省所賜告尋玩悼離詞髣髴想容
儀歔歔不自持何時當奉面娛目於書詩何以訴辛苦
告情於文辭

曾殷仲文送東陽太守詩曰昔人深誠歎臨水送將離
如何祖良遊心事孱在斯虛亭無留賓東川緬逶迤
曾何敬祖洛水祖王公應詔詩曰穆穆聖王體此慈仁

反于之至通于明神遊宴綢繆情戀所親薄言餞之于
浴之濱高崖巖巖洪流湯湯春風動衿歸鴈和鳴我后
饗客鼓瑟吹笙舉爵惟別聞樂傷情嘉宴既終白日西
歸羣司告旋鑾輿整綏我皇重離頓轡駉駉臨川永歎
輟涕霑頤崇恩感物左右同悲

宋孝武與廬陵王紹別詩曰連歲矜離心今茲幸良集
信宿窮晨暮開顏披所載未盡歡晤懷已傷岐路及舳
艫引江介飛旌背爾邑悄擾徒旅戒團欒流景入遲遲

分手念泣泣登路泣

宋平王代收就長路詩曰聳轡高陵曲揮袂廣川漬黃
塵昏白日悲風起浮雲蕭條萬里別契闊三秋分時往
從朝露年來驚夕氲徘徊去芳節依遲從遠軍

宋謝靈運相送方山詩曰祇役出皇邑指期憇甌越解
纜及流潮悽舊不能發析析就衰林皎皎明秋月含情
易為盈遇物難可歇又荅謝惠連詩曰懷人行千里我
勞盈十旬別時花灼灼別後葉蓁蓁

宋謝惠連西陵獻康樂詩曰哲兄感此別相送越垞林
飲餞野亭館分袂澄湖陰悽悽留子言眷眷浮客心迴
塘隱艫柁遠望絕形音又與孔曲阿別詩曰悽悽乘風
秋言餞千里舟塗屆雲陽邑邑宰有昔遊行人雖念路
為爾暫淹留又夜集歎乖詩曰詩人詠踟躕騷首歌離
別誠哉曩日歡展矣今夕切吾生赴遙令質明即行轍
在貧故宜言贈子保溫惠曷用書諸紳久要亮有誓
宋顏延之為皇太子侍宴餞衡陽南平二王應詔詩曰

太儀在御皇聖居貞旁緝民紀仰緯天經物資感變神
以瑞形川無遁寶山不閼靈亦既戒裝皇心載遠夕悵
亭臯晨儀禁苑神行景驚發自靈閭對宴感分瞻秋悼
晚

宋鮑照詩曰輕鴻戲江潭孤鴈集洲汜邂逅兩相親同
念共無已風雨好東西一隅頓千里追憶栖宿時聲容
滿心耳揚翩不能翔徘徊煙霧裏又送盛侍郎詩曰北
臨出塞道南望入鄉津高墉宿寒霧平野起秋塵

齊王儉後園餞從兄豫章詩曰茲夕竟何夕念別開曾
軒光風轉蘭蕙流月汎虛園

齊王融奉辭鎮西應教詩曰未學謝能筭高義幸知遊
雷庭參辯與梁苑豫才鄒徘徊歲光晚搖落江樹秋風
旗縈別浦霜瑣迤遙州又蕭諮議西上夜集詩曰徘徊
將所憂惜別在河梁衿袖三春隔江山千里長寸心無
遠近邊地有風霜勉哉勤歲暮敬矣慎容光山中殊未
懌杜若空自芳

齊謝朓別王僧孺詩曰花樹雜為錦月池皎如練如何
當此時別離言與宴非君不見思所悲思不見又與江
水曹詩曰山中上芳月故人清樽賞遠山翠百重廻流
映千丈花枝聚如雪垂藤散猶網別後能相思何嗟異
風壤又懷故人詩曰芳洲有杜若可以贈佳期望望忘
超遠何由見所思我行未千里山川已間之離居方巖
月故人不在茲清風動簾夜孤月照窓時安得同携手
酌酒賦新詩又離夜詩曰玉繩隱高樹斜漢映曾臺離

堂華燭盡別幌清琴哀翻潮尚知恨客思耿難裁山川
不可夢況乃故人杯又將發石頭上烽火樓詩曰徘徊
戀皇邑躑躅矚曾阿陵高墀闕近眺迴風雲多荆吳阻
山岫江海合瀾波歸飛無羽翼其如別離何又新亭渚
別范雲詩曰洞庭張樂地瀟湘帝子游雲去蒼梧野水
還江漢流停驂我悵望輟棹子夷猶廣平聽方籍茂陵
方見求心事俱已矣江上徒離憂

齊虞義送友人上湘詩曰濡足送征人褰裳臨水路共

盈一樽酒對之愁日暮漢廣雖容舫風悲未可渡佳期
難再得願但論心故沅水日生波芳洲行墜露共知邛
壑改同無金石固

齊劉繪送別詩曰春潮方解箨弱柳向低風相思將安
寄悵望南飛鴻

齊張融別詩曰白雲山上盡清風松下歇欲識離人悲
孤臺見明月

梁簡文帝示晉陵弟詩曰零雨岐路悲送歸臨水節時

事雖為舛離憂等閑別又餞臨海太守劉孝儀蜀郡太守劉孝勝詩曰碣石臨東海峨眉距西候兩杜昔夾河二龍今出守方無夜犬驚向息神牛闕涼風繞輕幕麥雨交新溜念此一銜觴懷離在惟舊又餞廬陵內史王修應令詩曰餞行臨上節開筵命羽觴迴池瀉飛棟濃雲垂畫堂踈槐未合影仄日暫流光園梅斂新艷階蕙結初芳又餞別詩曰行樂出南皮宴餞臨華池籜解篁開節花閨鳥迷枝牕陰隨影度水色帶風移徒命銜杯

酒終成憫別離又送別詩曰行行異汴海依依別路岐
水苔隨纜聚岼柳拂舟垂石菌生懸葉江槎流卧枝燭
盡悲宵去酒滿惜將離又傷離新體詩曰傷離復傷離
別後情鬱紆悽悽隱去棹憫憫愴還途感感意不申轉
顧獨霑襟前驅經御宿後騎歷河濬胡香翼還慙清笳
送後塵落日斜飛蓋餘暉承畫輪柳影長橫路槐枝深
隱人桂宮夕掩銅龍扉甲館宵垂雲母幃朧朧月色上
的的夜螢飛草香襲余袂露灑霑人衣帶堞淩城雲亂

聚排枝度葉鳥爭歸盤中浮蟻不能酌琴間玉徽調別
鶴別鶴千里別離聲絃調軫急心自驚試起登南樓還
向華池遊前時篠生今欲合近日栽荷尚不抽猶是銜
杯共賞處今茲對此獨生愁樓高望曖曖山川自分態
偃師雖北連轅轅已南背遠聽寂無聞遙瞻目有闌舍
毫意不迷長歎情無賴

梁昭明春日宴晉熙王詩曰百六鍾期數三七厄時中
國難悲如燬親離歎數窮藩哲遊沮夢揚化撫遠戎幸

茲同宴醕引滿愛樽空

梁范雲之零陵郡次新亭詩曰江干遠樹浮天末孤煙
起江天自如合烟樹還相似滄流未可源高飄去何已
又別詩曰洛陽城東西長作經時別昔去雪如花今來
花似雪又送沈記室夜別詩曰桂水澄夜氛楚山清曉
雲秋風兩鄉怨秋月千里分寒芝寧共採霜猿行獨聞
捫蘿正憶我折桂方思君又別詩曰孤煙起新豐候鴈
出雲中草低金城霧木下玉門風別君河初滿思君月

屢空折桂衡山北摘蘭沅水東蘭摘心焉寄桂折意誰
通

梁江淹貽袁常侍詩曰昔我別楚水秋月麗秋天今君
客吳坂春日媚春泉幽冀生碧草沅湘含翠煙鑠鑠霞
上景情情雲外山涉江竟何望留滯空採蓮又臨秋怨
別詩曰四時煎日夜玉露催紫榮始懷未及歎春意秋
方驚涼草散螢色衰樹斂蟬聲承君客江潭先愁鴻鴈
鳴吳山饒離袂楚水多別情金碧堅不滅桂華蘭有英

但見一葉落哀恨方未平又擬古雜體詩曰遠與君別
者乃至鴈門關黃雲蔽千里遊子何時還送君如昨日
簷前露已團不惜蕙草晚所悲道里寒君行在天涯妾
身長別離願一見顏色不異瓊樹枝菟絲及水萍所寄
終不移

梁宗夔詩曰別酒正參差乖情將陸離悵焉臨桂苑慙
默瞻華池輕雲流惠采時雨亂清漪眇眇追蘭徑悠悠
結芳枝眷言終何託心寄方在斯

梁蕭琛別詩曰落日總行轡薄別在江干遊客無淹期
晨川有急瀾分手信云易相思誠獨難之子兩特達伊
余日盤桓俟我式微歲共賞階前蘭

梁任昉詩曰離燭有窮輝別念無終緒岐言未及申離
目已先舉揆景巫衡阿臨風長楸渚浮雲難嗣音徘徊
悵誰與儻有闕外驛聊訪狎鷗鷺

梁丘遲侍宴樂遊苑餞徐州刺史應詔詩曰詰旦闔閭
開馳道聞鳳吹輕萸承玉輦細草藉龍騎風遲山尚響

雨息雲猶積巢空初鳥飛
荇亂新魚戲寔惟北門重
匪親孰為寄參差別念舉
肅穆恩波被小臣信多幸
投生豈酬義

梁沈約侍宴謝朓宅餞東歸應詔詩曰皇情悵東舳羽
旆拂南廡夏雲清朝景秋風揚早蟬飲和陪下席論道
光上筵又侍宴樂遊苑餞徐州刺史應詔詩曰沃若動
龍驂參差凝鳳管金塘草未合玉池泉將滿又侍宴樂
遊苑餞呂僧珍應詔詩曰丹浦非樂戰負重切君臨我

皇蘊至德忘已用堯心愍茲區宇內魚鳥失飛沉推轂
二嶠道揚旆九河陰超乘盡三屬選士皆百金戎車出
細柳餞席遵上林命師誅後服授律緩前禽函輶方解
帶嶢武稍披衿伐罪芒山曲弔民伊水潯將陪告成禮
待此未抽簪又別范安詩曰平生少年日分手易前期
及爾同衰暮非復別離時勿言一樽酒明日難共持夢
中不識路何以慰相思又送友人別詩曰君東我亦西
銜悲涕如霰浮雲一南北何由展言宴方作異鄉人贈

子同心扇遙裔發海鴻連翩出簷燕春秋更去來參差不相見又別謝文學詩曰漢池水如帶巫山雲似蓋一望沮漳水寧思江海會以我徑寸心從君千里外

梁王筠侍宴餞川王北伐應詔詩曰金版韜英玉牒蘊精帝德乃武王威有征軒習弧矢夏陳干戚周驚戎車漢馳羽檄我皇俊聖千年鍾武德洞十門威加八柱金正圯德水行失道胡馬南牧戎徒西保荐食伊瀍整居澧鎬金闕揚塵銅臺茂草命彼膳夫爰詔協律樂武出

車弦操別日玉饌駢羅瓊漿泛溢聖德溫溫賓儀秩秩
梁蕭子顯侍宴餞陸倕應令詩曰儲皇餞離送廣命傳
羽觴侍遊追曲水開宴等清漳新泉已激浪初卉始含
芳雨罷葉增綠日斜樹影長

梁劉孝綽侍宴餞庾於陵應詔詩曰皇心眷將遠悵餞
靈芝側是日青春獻林塘多秀色芳卉疑綸組嘉樹似
雕飾遊絲綴鶯領光風送綺翼下輦朝既盈留宴景將
昃高辯競談端奇文爭筆力伊臣獨無伎何由奉吹息

又侍宴餞張惠紹應詔詩曰滄池誠自廣蓬山一何峻
麗景花上鮮油雲葉裏潤風度餘芳滿鳥集新條振餞
言班俊造光私獎輶舫徒然謬反隅何以窺重仞又應
令詩曰鮮雲積上月凍雨晦初陽迴風飄淑氣落景換
新光竹萌始防露桂挺已含芳瑤堦變杜若玉沼發攢
蔣聖祿惜岐路曲宴闢闌堂又江津寄劉之遴詩曰與
子如黃鵠將別復徘徊經過一柱觀出入三休臺共摘
雲氣藻同舉霞文杯佳人每曉遊禁門恒晚開欲寄一

言別高駕何由來又發建興渚示陸劉二黃門詩曰扁
舟去平樂還顧極川梁猶聞棗下吹尚識杏間堂洛橋
分曲渚官寺隱迴塘客行裁跬步即事已多傷況復千
餘里悲心未遽央又侍離宴詩曰輾輾東北望江漢西
南永羽旗映日移鏡吹臨風警令王愍追送纜舟餞俄
頃掩袂望征雲銜杯惜餘景首燕徒有心局步何由騁
梁吳筠送呂外兵詩曰白雲浮海際明月落河濱送君
長歎息徒使淚霑巾又別夏侯故章詩曰白馬黃金羈

青驪紫絲鞵新知關山別故人河梁送置此一函書為
余達雲夢又酬別詩曰故人杯酒別天清明月亮露下
寒葭中風起秋江上衣染潺湲泣棹犯參差浪七首直
千金七寶雕華裝生離何用表賴此持相餉又別王謙
詩曰嚴光不遂世流轉任飛蓬欲還天台嶺不狎甘泉
宮離歌玉絃絕別酒金卮空儻遺故人念僕在東山東
又贈搖郎詩曰星漢正參差佳人不在斯宿昔暫乖阻
何異遠分離露染薜蘿葉日照芄蘭枝風光已飄薄雲

采復逶迤勞夢無人覺
默默心自知又贈別詩曰客二
慘無歡送別江之干白雲方耿耿黃鳥尚關關
紛紛巫山石合沓洞庭瀾
行衣侵曉露征舫犯夜湍
無因停合浦見此去珠還
又贈別詩曰樹響浹山來
猿聲繞岫急旅帆風飄揚
行巾露霑濕深浪閣蒹葭
濃雲沒城邑不見別離人
獨有相思泣又贈別詩曰
君留朱門裏我至廣江濱
城高望猶見風多聽不聞
流蘋方繞繞落葉尚紛紛
無由得共賞山川間白雲

梁何遜與胡興安夜別詩曰居人行轉軾客子暫維舟
念此一筵笑分為兩地愁露濕寒塘草月映清淮流方
抱新離悵獨守故園秋又從鎮江州與遊故別詩曰歷
稔共追遊一旦辭羣匹復如東流水未有西歸日夜雨
滴空階曉燈暗雕室相悲各罷酒何時更促膝

梁庾肩吾侍宴餞湘東王詩曰陳王從遊士高宴入承
華並載同連璧雕文類簡沙落後時動樹墜雪暫搖花
念此離筵促方愁別路賒又侍宴餞湘州刺史張續詩

曰洞庭資善政層城送遠離九歌揚妙曲八桂動芳枝
雨足飛春殿雲峯入夏池郢路方遼遠湘山轉蔽虧何
當好風日極望長沙垂又餞張孝總應令詩曰層臺臨
迴漲耿耿青烟上欲送分符人翻似河隄望寒雲暗積
水秋雨蒙重嶂別念動神衿華文切離貺慙無寡和曲
難陪郢中唱又應令詩曰江上早寒生蕭條鏡管清別
筵開帳殿離舟卷幔城前山黃葉起對岸白沙驚臨渴
同極望竊吹愧才輕又侍宴餞東陽太守范子雲詩曰

東部資良守北宮敦獻酬新枝漸接樹故凍欲含流早
花少餘雪春寒極晚秋徒嗟白岼遠空想赤松遊又新
林送劉之遴詩曰旆轉黃山路舟纜白馬津送輪時合
幟分驂各背塵常山喜臨代隴頭悲望秦欲持漢中策
還以贈征人

梁朱超道別席中兵詩曰數年共遊息一旦各聯翩莫
論行近遠終是隔山川長波漫不極高岫鬱相連急風
亂還鳥輕寒靜暮蟬扁舟已入浪孤帆漸逼天停車對

空渚長望轉依然

梁劉顯發新林浦贈同省詩曰迴首望歸途山川邈離
異落日懸秋浦歸鳥飛相次感物傷我情惆悵懷親懿
梁劉孺侍宴餞新安太守蕭幾應令詩曰芝殿延薄景
畫室寫油雲玄覽多該洽聖思究前聞微密探精義優
游妙典墳飲餞參多士言贈賦新文

梁王僧孺送殷何兩記室詩曰掩袖出南浦驅車送上
征飄飄曉雲駛養養旦潮平不肖余何惜無貲是勿輕

儻有還書便一言訪死生

梁張纘侍宴餞東陽太守蕭子雲詩曰仲月發初陽輕
寒帶春序淶池解餘凍丹霞霽新雨良守謁承明徂舟
戒蘭渚皇儲惜將邁金樽留宴醕

周王褒入關故人送別詩曰百年餘古樹千里闇黃塵
關山行就近相看成遠人又別裴儀同詩曰河橋望行
旅長亭送故人沙飛似軍幕蓬卷若車輪邊衣苦霜雪
愁貌損風塵行路皆兄弟千里念相親又別陸才子詩

日解纜出南浦征棹且凌晨還看分手處唯餘送別人
中流搖蓋影邊江落騎塵平湖開曙日細柳發新春滄
波不可望行雲聊共因又別王都官詩曰連翩憫流水
悽愴惜離羣東西御溝水南北會稽雲河橋兩隄絕橫
岐數路分山川遙不見懷袖遠相聞

周庾信應令詩曰望別非新館開舟即舊灣浦喧征棹
發亭空送客還路塵猶向水征帆獨背關又和保法師
曰秦關望楚路灞岸想江潭幾人應落淚看君馬向南

又和侃法師詩曰客遊經歲月羈旅故情多近學衡陽
鴈秋分俱渡河又和侃法師詩曰迴首河隄望眷眷嗟
離絕誰言舊國人到在他鄉別又寄王琳詩曰玉關道
路遠金陵信使踈獨下千行淚開君萬里書又別周弘
正詩曰扶風石橋北函谷故關前此中一分手相逢知
幾年黃鵠一反顧徘徊戀愴然自知悲不已徒勞減瑟
絃

陳周弘正隴頭送征客詩曰朝霜侵漠草流沙度隴飛

一聞流水曲行住兩霑衣又荅林法師詩曰客行七十
歲歲暮遠但征寒雲結不解隴水凍無聲君看日近遠
為忖長安城

陳徐陵新亭送別應令詩曰鳳吹臨伊水時駕出河梁
野燎村田黑江秋岼荻黃隔城聞上鼓迴洲隱去檣神
襟愛遠別流睇極清漳又別毛永嘉詩曰願子屬清規
歸來振羽儀嗟余今老病此別恐長離白馬君來哭黃
泉我詎知徒勞脫寶劒空挂隴頭枝

陳張正見征虜亭送新安王應令詩曰鳳吹臨南浦神
駕餞東平亭迴漳水乘旆轉洛濱笙地凍班輪響風嚴
羽蓋輕燒田雲色暗古樹雪花明岐路一迴首流襟動
眷情又秋日別庾正負詩曰征途愁轉旆連騎慘停鑣
朔氣凌疎木江風送上潮青雀離帆遠朱鷺別路遙唯
有當秋月夜夜上河橋

陳陰鏗送始興王詩曰良守別承明枉道暫逢迎去帆
收錦紵歸騎指蘭城紛紜連山暗潺湲派水清桂晚花

方白蓮秋葉始輕背飛傷客念臨歧憫聖情分風不得
速何由送上征又江津送劉光祿不及詩曰依然臨送
渚長望倚河津鼓聲隨聽絕帆勢與雲鄰泊處空餘鳥
離亭已散人林寒正下葉鉤晚欲收綸如何相背遠江
漢與城闔又廣陵岼送北使詩曰行人引去節送客艤
歸艫即是觀濤處仍為郊贈衢汀洲浪已息邗江路不
紆亭嘶背櫂馬檣轉向風烏海上春雲雜天際晚帆孤
離舟對零雨別渚望飛鳧定知能下淚非但一楊朱

陳江總贈洗馬袁朗別詩曰賈誼登朝日終軍對奏年
校文升廣內撫劒入崇賢奇才殊艷逸將別愛留連驅
車命鏡管拱坐面林泉池寒稍下鴈木落久無蟬霧停
山扉月風開石路煙高談無與慰遲爾報華篇又別袁
昌州詩曰河梁望隴頭分手路悠悠徂年驚若電別日
欲成秋黃鵠飛飛遠青山去去愁不言雲雨散更似東
西流又賦得携手上河梁應詔詩曰早秋天氣涼分手
關山長雲愁數處黑木落幾枝黃鳥歸猶識路流去不

知鄉秦川心斷絕何處是河梁又別袁昌州詩曰客子
歎途窮此別異西東關山嗟墜葉岐路憫征蓬別鶴聲
聲遠愁雲處處同又別賓化侯詩曰分岐泣世道念別
傷邊秋斷山時結霧平海若無流驚鷺一羣起哀援數
處愁是日送歸客為情自可求又別永新侯詩曰送君
張掖郡分悲函谷關欲知腸斷絕浮雲去不還

藝文類聚卷二十九

欽定四庫全書

子部

藝文類聚卷三十一

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李荃

膳錄監生_臣孫慰祖

欽定四庫全書

藝文類聚卷三十

唐 歐陽詢 撰

人部十四

別下

怨

別下

賦 魏文帝離居賦曰惟離居之可悲政獨處於空牀愁
耿耿而不寐歷冬夜之悠長驚風屬於閨闥忽增激於
中房動帷裳之曖曖彼明燭之無光又感離賦曰建安
十六年上西征余居守老母諸弟皆從不勝思慕乃作

賦曰秋風動今天氣涼居常不快兮中心傷出北園兮
彷徨望衆墓兮成行柯條惜兮無色綠草變兮萎黃脫
微霜兮零落隨風雨兮飛揚日薄暮兮無悵思不衰兮
愈多招延佇兮良久忽踟躕兮忘家又永思賦曰仰北
辰而永思沂悲風以增傷哀遐路之漫漫痛長河之無
梁願託乘於浮雲嗟逝速之難當又出婦賦曰念在昔
之恩好似比翼之相親惟方今之疏絕若驚風之吹塵
夫色衰而愛絕信古今其有之傷莞獨之無恃恨眉嗣

之不滋甘沒身而同穴終百年之常期信無子而應出自典禮之常度悲谷風之不荅怨昔人之忽故被入門之初服出登車而就路遵長塗而南邁馬躊躇而迴顧野鳥翩而高飛愴哀鳴而相慕撫駢服而展節即臨沂之舊城踐麋鹿之曲蹊聽百鳥之羣鳴情悵恨而顧望心鬱結其不平

魏陳王曹植出婦賦曰以才薄之質陋奉君子之清塵承顏色以接意恐疎賤而不親悅新昏而忘妾哀愛惠

之中零遂推頰而失望退幽屏於下庭痛一旦而見弃
心忉怛以悲驚衣入門之初服背牀室而出征攀僕御
而登車左右悲而失聲嗟冤結而無訴乃愁苦以長窮
恨無愆而見弃悼君施之不終又愍志賦曰或人有好
鄰人之女者時無良媒禮不成焉彼女遂行適人有言
之於余者余心感焉乃作賦曰竊託音於往昔迄來春
之不從思同遊而無路情壅隔而靡通哀莫哀於永絕
悲莫悲於生離豈良時之難俟痛余質之日虧登高樓

以臨下望所歡之攸居去君子之清宇歸小人之蓬廬
欲輕飛而從之迫禮防之我拘又歸思賦曰背故鄉而
遷徂將遙憇乎北濱經平常之舊居感荒壤而莫振城
邑寂以空虛草木穢而荆榛嗟喬木之無陰處原野其
何為信樂土之足慕忽并日而載馳

魏王粲出婦賦曰既僥倖兮非望逢君子兮宏仁當隆
暑兮翕赫猶蒙眷兮見親更盛衰兮成敗思情固今日
新竦余身兮敬事理中饋兮恪勤君不篤兮終始樂枯

萋兮一時心搖蕩兮變易忘舊姻兮棄之馬已駕兮在
門身當去兮不疑攬衣帶兮出戶顧堂室兮長辭

晉陸機別賦曰伊公子之可懷悲永別之局期悼同居
之無樂曾不踰乎一暮經春秋之寒暑常戚戚而不怡
登九層而脩觀超臨遠以相思

晉傅咸感別賦曰嘉天地之交泰美萬物之會通悅朋
友之攸攝慕管鮑之遐蹤退以文而會友欽公子之清
塵信同聲之相應意未寫而情親誓推好之齟齬分綢

繆而日新蘭蕙含芬有時而馨龍驤踔足有時而征乾
道變化時惟大明我我睦友載揚厥聲降聖宰之旌招
曜羽儀之上京贊唐虞之嘉運超飛躍乎太清佩銀璜
於帝側拖紫艾於天庭瞻神極之眇眇喜吾子之寵榮
無荆玉之夜觀猥齊景於夜光敢有覲於斯舉欣與子
而並翔天啓其願自忝蘋蘩幼則同遊長則同班同心
厥職其臭如蘭庶績未凝聖朝疇咨顯佐納言光綜萬
機出順景而為偶入閒然而無依步虛宇以低迴想宴

笑之餘暉意纏綿而彌結淚雨面而霑衣

梁江淹別賦曰黯黯銷魂者唯別而已矣况秦吳兮絕
國復燕宋兮千里或春苔兮始生乍秋風兮暫起是以
行子腸斷百感悽惻風蕭蕭而異響雲漫漫兮奇色舟
凝滯於水濱車逶遲於山側棹容與而未前馬哀鳴而
不息掩金觴而誰御橫玉柱而霑軾居人愁卧恍若有
亡日下壁而沉彩月上軒而飛光知離夢之躑躅意別
魂之飛揚爾乃別雖一緒事乃萬族至若龍馬銀鞍朱

軒繡軸帳飲東都送客金谷琴羽張兮簫鼓陳燕趙歌
兮傷美人珠與玉兮艷暮秋羅與綺兮嬌上春造分手
而銜涕感寂寞而傷神乃有劒客慙恩少年報士韓國
趙廁吳宮燕市驅征馬而不顧見行塵之時起又若君
居淄右妾家河陽同瓊珮之晨照共金爐之夕香君結
綬兮千里惜瑤草之徒芳慙幽宮之琴瑟悔臺上之流
黃春闌闕此青苔色秋帳涵茲明月光夏簟清兮晝不
暮冬釭凝兮夜何長織錦曲兮泣已盡迴文詩兮影獨

傷是以別方不定別理千名有別必怨有怨必盈使人
意奪神駭心摧骨驚又去故鄉賦曰日已暮兮隱吳山
之丘虛北風折兮絳花落流水散兮翠葉踈發桂枝而
不見悵浮雲之離居乃凌大壑越蒼淵茫茫積水陵陵
斷山窮陰近海平蕪帶天於是泣故關之已虛傷故國
之無際出汀洲而解冠入淑浦而捐袂芳州之草行欲
暮桂水之波不可渡絕世獨立兮報君子之一顧是時
霜翦蕙兮風摧芷平原晚兮黃霧起重曰江南之杜衡

兮色已陳願使黃鵠兮報佳人橫羽觴而掩望撫玉琴
兮何親

梁劉孝儀歎別賦曰在羈旅兮為思每居常而不樂意
難偕於駘蕩情易邀於隕穫愁非和而自來憂試排而
不却退求已以自省慨撫衿而太息位不俟於一進髮
徒彰於二色名有似於務耕學無均於譬織在初歸之
為慶庶因拙而自收保私庭之宴喜共兄弟而嬉遊校
小文於瑤筆比楷式於臨流止每歡於接膝行如喜於

同輶忽一去而數千遂離居而別域阻同被於當寐乖
共殮於終食唯憑遠望以代歸負相思其無力

梁張纘離別賦曰太常劉侯前輩宿達余在紉綺之歲
固已欽其風矣及理棹江干攬涕還望采蕭之詠不覺
成篇彼劉侯之矯矯承世德之清輝挺荆衡之菌籜輝
江漢之珠璣昔相知於一定逾盛衰乎二紀豈因媒以
成親非彈冠而來仕分自諧於金石情冥符乎蘭芷忘
時輩之後先略相知之年齒及胥遇於雲閣又方駕而

聯曹宵擁衾而暗語晝稅鞅以遊遨案方前而等食衣
共體而同袍猶合歡之燭愈如來蘇之釋勞唯吾人之
與子今諒不言其已召在百代而奚殊雖十年而同調
寧風波之所移豈流俗之能要非高唱而云擬逢下士
而或笑隔願言於信次尚眷眷而興懷矧雲崖之遠訣
抱離袖而長乖顧龍門而掩涕瞻郢路而何偕在鷺禽
之屢感迫徂年之長暮眺湘沅之分流遵洞庭之永路
山峻高而易隱浦邐迤而難沂援啾啾而夜吟鵲騷騷

而曉度撫客子兮其何心能辭鄉兮別故抱荃蕙之
遺芳共離披於霜露

書漢李陵與蘇武書曰子卿名聲冠於圖籍分義光于
二國形影表於丹青爵祿傳於王室家獲無窮之寵永
明白於千載夫行志志立求仁得仁雖遭困厄死而後
已將何恨哉陵前提步卒五千深入匈奴右地三千餘
里雖身降名辱下計其功豈不足以免老母之命耶嗟
乎子卿世事謬矣功者福主今為禍先忠者義本今為

重患是以彭蠡赴流屈原沉身子欲居九夷此不由感
怨之志耶行矣子卿恩若一體分為二朝悠悠永絕何
可為思人殊俗異死生斷絕何由復達

漢蘇武報李陵書曰曩以人之奉使方外至使遐夷作
逆封豕造悖豺狼出爪摧辱王命身幽於無人之處跡
戢於胡塞之地軟朝露以為飲茹田鼠以為糧窮目極
望不見所識側耳遠聽不聞人聲當此之時生不足甘
死不足惡所以忍困強存徒念忠義雖誘僕以隆爵厚

寵萬金之利不以滑其慮也迫以白刃在頸鐵鎖在喉
不以動其心也何則志定於不回期誓於殁命幸賴聖
明遠垂拯贖得使入湯之禽復假羽毛別斷之足復蒙
連續每念足下才為世英器為時出語曰夜行被繡不
足為榮况於家室孤滅棄在絕域衣則異制食味不均
棄捐功名雖尚視息與亡無異向使君服節死難書功
竹帛傳名千代茅土之封永在不朽不亦休哉嗟乎李
卿事已去矣失之毫釐差之千里將復何言所貺重遺

義當順承本為一體今為異俗余歸漢室子留彼國臣
無境外之交故不當受乖離邈矣相見末期國別俗殊
死生隔絕代馬越鳥能不依依謹奉荅報并還所贈

李陵重報書曰子卿足下勤宣令德策名清時榮問休
暢幸甚幸甚遠託異國昔人所悲望風懷想能不依依
自從初降以至今日身之困窮獨坐愁苦終日無覩但
見異類韋韞毳帳以御風雨羶肉酪漿以充饑渴舉目
言笑誰與為歡涼秋九月塞外草衰夜不能寐側耳遠

聽胡笳互動牧馬悲鳴吟嘯成羣邊聲四起晨坐聽之
不覺淚下與子別後益復無聊身負國恩為世所悲子
歸受榮我留受辱命也何如身出禮義之鄉入無知之
俗每一念至忽然忘生陵不難刺心以自明刎頸以見
志顧國家於我已矣殺身無益適足增羞左右之人見
陵如此為不入耳之歡來相勸勉異方之樂祇令人悲
增忉怛耳子卿視陵豈偷生之士而惜死之人哉誠以
虛死不如立節滅名不如報德也昔范蠡不殉會稽之

耻曹沫不死三敗之辱卒復句踐之讎報魯國之羞區
區之心竊慕此爾足下又云漢於功臣不薄子為漢臣
安得不云爾乎足下昔以單車之使適萬乘之虜丁年
奉使皓首而歸老母終堂生妻去室此天下所希聞古
今所未有聞子之歸賜不過二百萬位不過典屬國子
尚如此陵復何望哉且漢厚誅陵以不死薄賞子以守
節欲使遠聽之臣望風馳命此實難矣男兒生以不成
名死則葬蠻夷中誰復能屈身稽顙迴向北闕使刀筆

之吏弄其文墨耶嗟乎子卿夫復何言相去萬里人絕路殊生為別世之人死為異域之鬼長與足下生死辭矣

後漢張奐與延篤書曰唯別三年無一日之忘京師禁急不敢相聞豈不懷歸畏此簡書年老氣衰智盡謀索每有所處違宜失便比為兒車所讎中為馬循所困真欲入三泉之下復鎮之以大石厄乎此時也且太陰之地水厚三尺木皮三寸風寒慘冽剥脫傷骨但此自非

老憊者所堪而復加之以師旅因之以饑饉衆難聚集
不可一二言也聾盲日甚氣力寢衰神耶當復相見者
從此辭矣

後漢竇玄形貌絕異天子以公主妻之舊妻與玄書別
曰棄妻卅女敬白竇生卑賤鄙陋不如貴人妾日已遠
彼日已親何所告訴仰呼蒼天悲哉竇生衣不厭新人
不厭故悲不可忍怨不自去彼獨何人而居我處

晉趙景真與稽茂齊書曰昔李叟入秦及闕而歎梁生

適越登岳長謠夫以嘉遯之舉猶懷戀恨况乎不得已者哉惟別之後離羣獨逝背榮宴辭倫好經迥路造沙漠鳴雞戒旦則飄爾晨征日薄西山則馬首靡託或乃迴飈狂厲白日寢光崎嶇交錯陵隰相望涉澤求蹊披榛覓路嘯詠溝渠良不可度斯亦行路之艱難然非吾心之所懼也又北土之性難以託根投人夜光鮮不案劔今將植橘柚於玄朔華竊於脩陵表龍章於裸壤奏韶武於輦俗固難以取貴矣朝霞啓暉則身疲於邁

征太陽戢曜則情効於夕惕思躡雲梯橫奮八極披艱
掃穢蕩海夷岳蹴崑崙使西倒踏泰山令東覆平滌九
區恢廓宇宙斯亦吾心之鄙願也時不我與垂翼遠逝
鋒鉞靡加六翮摧屈自非樂天知命誰能不憤悵者哉
吾子植根芳苑擢秀清流榮耀眩其前艷色餌其後良
儔交其左聲名馳其右翺翔倫黨之間弄姿房帷之裏
從容顧眄綽有餘裕俯仰吟嘯自以為得志矣豈能與
吾同大丈夫之憂樂哉去矣嵇生永離隔矣莞莞飄寄

臨沙漠矣悠悠三千路難涉矣執手之期邈無日矣思
心彌結誰云釋矣無金玉爾音而有遐心身雖胡越意
存斷金

晉稽茂齊荅趙景真書曰登山遠望覩崿嶂以成憤策
杖廣澤瞻長波以增悲遊眄春園情有秋林之悴濯足
夏流心懷冬冰之慘對榮宴而不樂臨清觴而無歡今
足下琬琰之璞未剖而求光時之價騏驎之足未攄而
希絕景之功心銳而動淺望速而應遲故有企佇之懷

爾夫處靜不悶古人所貴窮而不濫君子之美故顏生
居陋不改其樂孔父困陳絃歌不廢幸吾子思宏遠理
舍道自榮將與足下交伯成於窮野結箕山乎蓬屋侶
范生於海濱傳黃綺於商岳憑輕雲以絕馳遊曠蕩以
自足雖不齊足下之所樂亦吾心之所願也

梁簡文帝與劉孝綽書曰執別灞池嗣音阻闊合璧不
停旋灰屢徙玉霜夜下旅鴈晨飛想涼燠得宜時候無
爽既官寺務煩簿領殷湊等張釋之條理同于公之明

察雕龍之才本傳靈虵之譽自高頗得暇逸於篇章從容於文諷頃擁旄西邁載離寒暑曉河未落拂桂棹而先征夕鳥歸林懸孤帆而未息足使邊心憤薄鄉思迴但離閣已久載勞寤寐佇聞還驛以慰相思又與蕭臨川書曰零雨送秋輕寒迎節江楓曉落林葉初黃登舟已積殊足勞止解維金闕定在何日八區內侍厭直御史之廬九棘外府且息官曹之務應分竹南川剖符千里但黑水初旋未申十千之飲桂宮既啓復乖雙闕

之宴文雅縱橫即事分阻清夜西園眇然未尅想征臚
而結歎望挂席而霑衿若使宏農書疏脫還鄴下河南
口占儻歸鄉里必遲青泥之封且覲朱明之詩白雲在
天蒼波無極瞻之岐路眷慨良深愛護波潮敬曷光彩
梁元帝與蕭挹書曰闊別清顏忽焉已久未復音息勞
望情深暑氣方隆恒保清善握蘭雲閣解紱龍樓允膺
妙選良為幸甚想同僚多士方駕連曹雅步南宮容與
自玩士衡已後唯在茲日惟昆與季文藻相暉二陸三

張豈獨擅美比暇日無事時復含毫頗有賦詩別當相
簡但衡巫峻極漢水悠長何時把袂共披心腹

梁劉孝標荅郭峙書曰聞君子舊矣但人非豕鹿轉加
蓬逝波駭雨散動間山川故無由交羽觴薦雜佩睨浮
雲以搔首臨清風而浩歌變燧迴星亦云勞止

周王褒與周弘讓書曰嗣宗窮途楊朱岐路征蓬長逝
流水不歸南北殊方炎涼異節木皮春厚桂樹冬榮攝
衛惟宜動靜多豫賢兄入關敬承闊曲猶依杜陵之水

尚保東陂之田鑿跡幽蹊銷聲窮谷何其愉樂幸甚幸
甚弟昔因多疾亟覽九仙之方晚涉世途猶懷五岳之
舉頃年事道盡容髮衰謝芸其黃矣零落無時還念生
涯繁憂總集視陰愒日類趙孟之徂年負杖行吟同劉
琨之積慘河陽北遊空思輦洛瀾陵南望唯見長安所
貴書生之魂還依舊里射聲之鬼無恨他鄉浮雲在天
邈無由矣會見之期長無日矣授筆攬紙龍鍾橫集

陳周弘讓荅王褒書曰甚矣悲哉此之為別也雲飛泥

沉金鑠蘭滅玉音不嗣瑤華莫因家兄至自鎬京致來
書於窮谷故人之跡有如對面開題申紙流臉霑膝與
弟分袂西陲言反東區雖保周陂還依蔣徑三荆離圻
二仲不歸麋鹿為曹更多悲緒丹經在握貧病莫諧芝
朮可求聊因採掇昔吾壯日及弟富年俱值邕熙並歡
衡泌南風雅操清觴妙曲弦琴促坐無乏夕晨玉瀝金
華冀獲難老不虞一旦翻覆波瀾吾已惕陰弟非茂齒
禽尚之契各在天涯永念生平難為胸臆正當視陰數

箭排愁破涕人生樂爾憂戚何為願愛玉體珍金相保
期願享壽考黃髮猶冀蒼鴈頰鯉時傳尺素清風朗月
但寄相思搦管操觚聲淚俱咽

陳徐陵荅尹義尚書曰別離二國雲雨十年心想河陽
言銅爵而無遠神遊漳水與金鳳而俱飛弟留連河北
義等周南懷此殊才實可傷歎吾崦嵫既暮容髮皤然
風氣彌留砭藥無損追惟疇昔共備行人家國安危實
禮升降懸壺代哭俱歷春冬移管于箕同茲辛苦鳴蜩

抱樹亟見藏水歸鴈銜蘆多歷寒食靖言念此如何可
忘夫以擁腫之木得免因於不才殼牖之牛自保由於
無用嗟余鄙陋未有龔生唯歎吾賢不同蘧瑗爾夫推
溝拯溺每切皇哀逸翮飄鱗見優機覽所以降尺一之
書馳輜軒之使心期與國必遂還途寧謂親鄰更成難
請伊昔梁朝共奉嘉聘張茲大帛處彼高閭庭奏歌鍾
座延嬌眄賓客之叙方於階阼田獵之禽同於君膳正
以鄉關阻亂致爾拘留家國隆平義應旋反韓宣屢至

宰孔頻還翻爾遲迴豈云鄰睦

怨

春秋潭潛巴曰河水逆流怨氣盛也

毛詩序曰亂世之音怨以怒其政乖又曰角弓父兄刺幽王也不親九族而好讒佞骨肉相怨故作是詩也駢角弓翩其反矣兄弟婚姻無胥遠矣

左傳曰晉侯賞從亡者介之推不言祿祿亦弗及其母曰盍亦求之以死誰懟對曰尤而效之罪又甚焉且出

怨言不食其食又曰晉郤至獻楚捷于周與單襄公語驟稱其伐單子語諸大夫曰溫季其亡乎位於七人之下而求掩其上怨之聚亂之本也多怨而階亂何以在位夏書曰怨豈在明不見是圖將慎其細也今而明之其可乎又曰吳公子札來聘請觀於周樂為之歌周南召南曰美哉始基之矣猶未也然勤而不怨矣為之歌小雅曰美哉思而不貳怨而不言其周德之盛乎又曰子產云我聞忠善以損怨不聞作威以防怨又曰君子

之言信而有徵故怨遠於身小人之言僭而無徵故怨咎及之

論語曰放於利而行多怨又曰貧而無怨難富而無驕易

管子曰凡禍亂之所生生於怨咎怨咎之所生在於非理故曰閑禍在除怨

楚辭曰怨靈脩之浩蕩終不察夫民心

淮南子曰和氏之璧夏后之璜揖讓而進之以合歡夜

以投人則為怨時與不時也

琴操曰王昭君者齊國人也顏色皎潔聞於國中獻於孝元帝訖不幸納積五六年昭君心有怨曠偽不飾其形容元帝每歷後宮疎略不過其處後單于遣使者朝賀元帝陳設倡樂乃令後宮粧出昭君怨恚日久乃便循飾善妝盛服光暉而出俱列坐元帝謂使者曰單于何所願樂對曰珍竒怪物皆悉自備唯婦人醜陋不如中國乃令後宮欲至單于者起昭君喟然越席而前曰

妾幸得備在後宮麤醜卑陋不合陛下之心誠願得行
帝大驚悔之良久太息曰朕已誤矣遂以與之昭君至
單于心思不樂乃作怨曠思惟歌曰秋木萋萋其葉萎
黃有鳥處山集于苞桑養育毛羽形容生光既得升雲
遊倚曲房離宮絕曠身體摧藏志念抑冗不得頡頏雖
得餽食心有徊徨我獨伊何改往變常翩翩之燕遠集
西羗高山戕戕河水泱泱父兮母兮道里悠長嗚呼哀
哉憂心惻傷

續漢書曰建武三十年三月羣臣上言即位三十年宜封禪泰山詔書曰百姓怨氣滿腹吾誰欺欺天乎曾謂泰山不如林放乎

詩魏阮瑀詩曰民生受天命漂若河中塵雖稱百齡壽孰能應此身猶獲嬰凶禍流離恒苦辛

宋鮑昭行路難曰君不見河邊草冬時枯死春滿道君不見城上日今暝沒西山明朝復更出今我何時得自然一滅永罷歸黃泉人生苦多歡樂少意氣數腴在盛

年且願得志數相就牀頭恒有沽酒錢功名竹帛非我
事存亡貴賤委皇天又曰馮水置平地各自東西南北
流民生亦有命安能行歎復坐愁酌酒以自寬舉杯斷
絕歌路難心非木石豈無感吞聲躑躅不敢言

齊謝朓玉階怨詩曰夕殿下珠簾流螢飛復息長安縫
羅衣思君此何極

梁元帝送西歸內人詩曰秋氣蒼茫結孟津復送巫山
薦枕神昔時慊慊愁應去今日勞勞長別人

梁豫章王蕭綜聽鐘鳴詩曰歷歷聽鐘鳴當知在帝城
西樹隱落月東窓見曉星霧露肫肫未分明鳥啼啞啞
已流聲驚客思動客情客思鬱從橫翩翩孤鴈何所棲
依依別鶴半夜鳴今歲行已暮雨雪向淒淒飛蓬旦夕
起楊柳尚翻低氣鬱結涕濁沱愁思無所託強作聽鐘
歌

梁范雲登城怨詩曰楚妃歌脩竹漢女奏幽蘭獨以閨
中笑豈知城上寒

梁劉孝綽班婕妤怨詩曰應門寂已閉非復後庭時况
在青春日萋萋綠草滋妾身似秋扇君恩絕履綦詎憶
遊輕輦從今賤妾辭

梁吳筠行路難曰洞庭水上一株桐經霜觸浪困嚴風
昔時抽心曜白日今旦卧死黃沙中洛陽名工見咨嗟
一剪一刻作琵琶白璧規心學明月珊瑚映面作風花
帝王見賞不見忘提携把握登建章掩抑摧藏張女彈
殷勤促柱楚明光年年月月對君子遥遥夜夜宿未央

未央綵女棄鳴篳爭見拂拭生光儀
茱萸錦衣玉作匣
安念昔日枯樹枝不學衡山南嶺桂
至今千載猶未知
又曰青瑣門外安石榴連枝接葉夾御溝
金墉城西合歡樹垂條照采拂鳳樓
遊俠少年游上路傾心顛倒想戀慕
摩頂至足買片言開胸瀝膽取一顧
自言家在趙邯鄲翩翩舌杪復劒端
青驪白駃的盧馬金羈綠鞵紫絲鞞
蹀躞橫行不肯進夜夜汗血至長安
長安城中諸貴臣爭貴儒者席上珍
復聞梁王好學問輕棄劒客如

埃塵吾丘壽王始得意司馬相如適被申大才大辯尚
如此何況我輩輕薄人又曰君不見西陵田從橫十字
成陌阡君不見東郊道荒涼蕪沒起寒煙盡是昔日帝
王處歌姬舞女達天曙今日翩妍少年子不知華盛落
前去吐心吐意許他人今旦迴惑生猶豫山中桂樹自
有枝心中方寸自相知何言歲月忽若馳君之情意與
我離還君玳瑁金雀釵不忍見此便心危又曰君不見
長安客舍門娼家少女名桃根貧窮夜紡無燈燭何言

一朝奉至尊至尊離宮百餘處千門萬戶不知曙唯聞
啞啞城上烏玉欄金井牽轆轤丹梁翠柱飛流蘇香新
桂火炊彫菰當年翻覆無常定薄命為女必已麤

梁孔翁歸班婕妤詩曰長門與長信日暮九重空雷
聲聽隱隱車響絕籠籠恩光隨妙舞團扇逐秋風鉛華
誰不見人意自難同

梁何思澄班婕妤詩曰寂寂長信晚雀聲愁洞房蜘蛛
網高閣駸蘚被長廊虛殿簾帷靜閒階花藥香愁愁視

日暮還復守空牀

梁施榮秦王昭君詩曰垂羅下椒閣舉袖拂胡塵即即
撫心歎蛾眉誤殺人

梁徐悱妻劉氏班婕妤怨詩曰日沒應門閉愁思百端
生况復昭陽近風傳歌吹聲寵移真不恨讒枉太無情
祇言爭分理非妬舞腰輕

梁王叔英妻劉氏王昭君怨詩曰一生竟何定萬事良
難保丹青失應圖匣玉成秋草相接辭闕淚至今猶未

燥漢使汝南還殷勤為人道

梁范靖妻沈氏昭君歎詩曰早信丹青巧重賂洛陽師
千金畫雲鬢百萬寫娥眉

陳陰鏗班婕妤詩曰栢梁新寵盛長信昔恩傾誰謂詩
書巧翻為歌舞輕花月分窓進苔草共階生憶淚衫前
滿單眠夢裏驚可惜逢秋扇何用合歡名

陳昭昭君辭曰跨鞍今永訣垂涕別親賓漢地隨行盡
胡關逐望新交河壅塞霧隴日閨沙塵唯有孤明月猶

能遠送人

賦漢董仲舒士不遇賦曰嗚呼嗟乎遐哉邈矣時來易
遲去之速矣屈意從人非吾徒矣正身俟時將就來矣
心之憂兮不期祿矣遑遑匪寧祇增辱矣努力觸藩徒
摧角矣不出戶庭庶無過矣重曰生不丁三代之盛隆
今而丁三季之末俗末俗以辯詐而期通貞士以耿介
而自束雖日三省於吾身繇懷進退之唯谷彼寔繁之
有徒指其白以為墨目信嫫而視眇口信辯而言訥鬼

神不能正人事之變戾聖賢亦不能開愚夫之違惑出門則不可與偕往藏器又出其不容退洗心而內訟固未知其所從觀上世之清暉廉士煢煢而靡歸殷湯有卞隨與務光周武有伯夷與叔齊孰若反身於素業莫隨世俗而輪轉雖矯情而獲百利不如復心而歸一善漢司馬遷悲士不遇賦曰悲夫士生之不辰愧顧影而獨存恒剋已而復禮懼志行而無聞諒才韙而世戾將逮死而長勤雖有行而不彰徒有能而不陳何窮達之

易惑信美惡之難分時悠悠而蕩蕩將遂屈而不伸使
公於公者彼我同兮私於私者自相悲兮天道微哉吁
嗟闊兮人理顯然相傾奪兮好生惡死才之鄙也好貴
夷賤哲之亂也炤炤洞達胸中豁也昏昏罔覺内生毒
也我之心矣哲已能忖我之言矣哲已能選沒世無聞
古人惟耻朝聞夕死孰云其否逆順還周乍沒乍起無
造福先無觸禍始委之自然終歸一矣

漢司馬相如陳皇后長門賦曰願賜問而自進兮得尚

君之玉音奉虛言而望誠兮期城南之離宮脩薄具而
自設兮君不肯而幸臨浮雲鬱而四塞兮天窈窕而晝
陰雷隱隱而響起兮聲象君之車音刻木蘭以為櫟兮
飾文杏以為梁日黃昏而望絕兮悵獨託於空堂懸明
月以自照兮但清夜於洞房援雅琴以變調兮奏愁思
之不可長案流徵以却轉兮聲窈妙而復揚搏芬若以
為枕兮席荃蘭而蒞香忽寢寐而夢想兮魂若君之在
傍

班婕妤自悼賦曰承祖考之遺德荷性命之淑靈登薄
軀於宮闈充下陳於後庭蒙聖皇之渥惠當日月之盛
明揚光烈之翕赫奉隆寵於增城既遇幸於非位竊庶
幾乎嘉時陳女圖而鏡鑑顧女史而問詩歷年歲而悼
懼閔蕃華之不滋白日忽以移光遂暗漠以昧幽猶被
覆載之厚德不廢捐於罪尤奉供養於東宮託長信之
末流重曰潛玄宮兮幽以清應門閉兮禁闥扃華殿塵
兮玉階苔中庭萋兮綠草生神眇眇兮密靜處君不御

兮誰為榮俯視兮丹墀思君兮履綦仰視兮雲渥雙涕
兮橫流顧左右兮和顏酌羽觴兮銷憂惟人生兮一世
忽一過兮若浮

魏丁廙蔡伯喈女賦曰伊太宗之令女稟神惠之自然
在華年之二八披鄧林之曜鮮明六列之尚致服女史
之話言參過庭之明訓才朗悟而通玄當三春之嘉月
時將歸於所天曳丹羅之輕裳戴金翠之華鈿美榮曜
之所茂哀寒霜之已繁豈偕老之可期庶盡歡於餘年

何大願之不遂飄微軀於逆邊行悠悠於日遠入窮谷
之寒山慙柏舟於千祀負冤魂於黃泉我羈虜其如昨
經春秋之十二忍胡顏之重耻恐終風之我萃詠芳草
於萬里想音塵之髣髴祈精爽於交夢終寂寞而不至
哀我生之何辜為神靈之所棄仰薜華其已落臨桑榆
之歔歔入穹廬之秘館亟踰時而經節歎殊類之非匹
傷我躬之無悅脩膚體以深失念蘭澤之空設佇美目
於胡忌向凱風而泣血

梁江淹恨賦曰試望平原蔓草縈骨拱木欽魂人生到此天道寧論於是僕本恨人心驚不已直念古者伏恨而死若乃趙王既虜遷於房陵薄暮心動昧旦晨興別艷姬與美女喪金輿及玉乘置酒欲飲悲來填膺千秋萬歲為怨難勝至如李君降北名辱身冤拔劒擊柱弔影慙魂若夫明妃去時仰天太息紫臺稍遠闕山無極搖風忽起白日西匿隴鴈少飛岱雲寡色望君皇今何期終蕪絕兮異域至如敬通見抵罷歸田里閉關却掃